

## PROGRAM

### **provođenja zaključaka vezanih za legalizaciju trgovaca sa svojstvom fizičkog lica u okviru organizovanih pijaca (tkz. "buvljih pijaca")**

Odredbom člana 12. Zakona o trgovini („Službene novine Federacije BiH“ br. 64/04 i 12/05), propisani su uslovi koje moraju ispunjavati trgovci sa svojstvom fizičkog lica, da bi im općinski organ izdao rješenje kojim se odobrava obavljanje određene trgovinske djelatnosti. Jedan od uslova je da poslovni prostor izgrađen u skladu sa važećim urbanističko-građevinskim propisima kantona kao poslovni prostor za obavljanje odgovarajuće trgovinske djelatnosti, a što utvrđuje nadležni opštinski organ Zakon o trgovini i Pravilnik o minimalno tehničkim uslovima za obavljanje trgovinske djelatnosti („Službene novine Federacije BiH“ br. 12/05 i 60/05), omogućava legalizaciju obavljanja trgovine u okviru organizovanih pijaca od strane fizičkih lica.

U cilju realizacije zaključaka potrebno je provesti aktivnosti i to:

1. Riješiti pitanje planskog utvrđivanja lokaliteta tzv. „buvljih pijaca“ sa tačno utvrđenim vremenom trajanja, odnosno do donošenja regulacionog plana.

Pitanje prostornog planiranja i korištenja zemljišta na razini Federacije BiH u nadležnosti je Federalnog ministarstva prostornog uređenja i nadležnih kantonalnih ministarstava.

Kako je članom 3. Zakona o prostornom planiranju i korištenju zemljišta na razini Federacije BiH („Službene novine Federacije BiH“, broj 2/06) utvrđeno, između ostalog, da se planiranje prostora temelji na načelu „usaglašenosti planskih dokumenata kantona sa planskim dokumentima Federacije i planskih dokumenata kantona međusobno“ neopohodno je izvrši usaglašavanje planskih dokumenata o utvrđivanju lokaliteta ovih pijaca.

Potrebno je da Federalno ministarstvo prostornog uređenja i nadležna kantonalna ministarstva usaglase planske dokumente o lokalitetima ovih pijaca. Do usaglašavanja, a u cilju legalizacije ovih trgovaca, nadležno kantonalno ministarstvo za prostorno uređenje treba izdati odgovarajuća rješenja ovim trgovcima za korištenje poslovnih prostora pijaca sa utvrđenim rokom trajanja, odnosno do donošenja regulacionog plana.

2. Paralelno, a u skladu sa rokovima trajanja rješenja o utvrđivanju lokaliteta pijaca na kojima će trgovci obavljati svoju djelatnost, putem nadležnog Federalnog ministarstva finansija i kantonalnih ministarstava, potrebno je pristupiti rješavanju načina plaćanja poreznih obaveza ovih trgovaca. Zbog veoma niskog prometa koji ovi trgovci ostvaruju u izuzetno otežanim uslovima rada, a u cilju obezbjeđivanja osnovne egzistencije, Vlada Federacije BiH će preporučiti vladama kantona da svojim odlukama djelatnost trgovaca na organizovanim pijacama tretiraju kao niskoakumulativnu i utvrde plaćanja poreza na dobit u najnižem paušalnom iznosu.

Aktivnosti po tačkama 1. i 2. nadležna ministarstva su dužna odmah pokrenuti i iste okončati u roku od 60 dana. O postupku provođenja navedenih aktivnosti obavezni su blagovremeno izvještavati Federalno ministarstvo trgovine, odnosno Vladu Federacije BiH.